

01 JUN 2001

PM-Nafi

LAPORAN DOW JONES MENGENAI SIDANG MEDIA PM TIDAK BENAR -- PEGAWAI

KUALA LUMPUR, 1 Jun (Bernama) -- Pejabat Perdana Menteri menafikan laporan AP-Dow Jones bahawa persidangan media Datuk Seri Dr Mahathir Mohamad sekembalinya dari Jakarta hari ini dipanggil secara tergesa-gesa.

"Itu tidak betul," kata penolong setiausaha akhbar Perdana Menteri, Sufi Yusoff, ketika dihubungi Bernama.

Laporan berita Dow Jones itu berbunyi:

"Berasaskan kepada persidangan media yang dipanggil secara tergesa-gesa kira-kira 0330 GMT untuk media tempatan, PM Mahathir dijangka membuat pengumuman besar hari ini; pasaran mungkin membimbangkan di tengah-tengah spekulasi yang semakin meningkat bahawa (Tun) Daim (Zainddin) mungkin meletak jawatan (sebagai Menteri Kewangan).

"Walaupun pada perancangan awal ialah untuk mengadakan taklimat eksklusif bagi media rasmi milik kerajaan, pertubuhan media tempatan lain telah dijemput kurang daripada satu jam sebelum ia sepatutnya bermula; media asing tidak dibenarkan menghadiri taklimat itu, Mahathir mengadakan persidangan media sekembalinya dari menghadiri mesyuarat G15 di Jakarta. KLCI kini turun 0.1 peratus pada 572.1."

Sufi menjelaskan bahawa persidangan media Dr Mahathir yang disebut dalam laporan AP-Dow Jones itu sebenarnya adalah persidangan media biasa yang diadakan setiap kali Perdana Menteri pulang dari luar negara dan ia terbuka kepada media tempatan.

Dalam hal ini Perdana Menteri pulang dari Jakarta selepas menghadiri persidangan kemuncak Kumpulan 15 Negara Membangun (G15).

Sufi berkata adalah tidak benar bahawa pertubuhan media tempatan telah dijemput kurang daripada satu jam sebelum persidangan media itu bermula.

"Jemputan itu dikeluarkan melalui agensi berita nasional Bernama, semalam, 31 Mei 2001," katanya.

Beliau berkata sebab mengapa hanya media rasmi dijemput sebelum itu ialah kerana Perdana Menteri dijangka tiba pukul 1.15 pagi (1 Jun 2001) yang memerlukan hanya liputan gambar bagi ketibaannya.

Oleh kerana penerbangan berkenaan diubah jadualnya ke 11 pagi ini, maka persidangan media diadakan untuk media tempatan, yang merupakan perkara biasa dan tidak ada apa-apa yang luar biasa, katanya.

Sebaik sahaja menerima maklumat dari pejabat Perdana Menteri, Bernama terus menghantar mesej kepada pelanggannya pukul 2.44 petang semalam mengenai penjadualan semula penerbangan pulang Dr Mahathir untuk mendarat pukul 1.15 pagi.

Selepas itu, apabila pejabat Perdana Menteri mengesahkan bahawa masa ketibaan Dr Mahathir dipinda dari 1.15 pagi ke 11 pagi, Bernama mengeluarkan satu lagi mesej pukul 4.23 petang semalam.

Perubahan jadual penerbang Perdana Menteri itu juga diulang dalam jadual liputan harian Bernama.

Sufi berkata oleh yang demikian, adalah tidak betul bagi AP-Dow Jones mengatakan bahawa pertubuhan media tempatan dijemput kurang daripada sejam sebelum persidangan Dr Mahathir bermula.

Juga tidak betul untuk mengatakan bahawa Dr Mahathir dijangka membuat satu pengumuman besar.

"Laporan berita Dow Jones bahawa Perdana Menteri dijangka membuat satu pengumuman besar adalah spekulasi semata-mata. Spekulasi dan pengumuman seumpama itu yang dibuat tanpa pengesahan terlebih dahulu dari pejabat ini (Pejabat Perdana Menteri) adalah tidak bertanggungjawab dan tidak tepat

sama-sekali," kata Sufi.

Pada persidangan media itu, Dr Mahathir menolak spekulasi yang Daim telah meletak jawatan dalam Kabinet.

Dr Mahathir telah berkata beliau tidak menerima apa-apa surat daripada Daim mengenai peletakan jawatan yang digembar-gemburkan itu.

-- BERNAMA

ES AU NMO